

# UOLI VOLOXU ANE PAULO MUKAUKAVU MULAI NOXI'A TA PILIPAI

## Vaikala lamana

No mine Paulo musokou xaixai noxou la anu mulai ne Pilipai tei sou mua'aloXu a'alo laixe sou Iesu Kalisito. Pilipai ne anu tuala tila ne Iuropu no xalee lia tila ne Makedonia (Aposeli 16:8-15). Paulo mukaXavu uoli voloxu ane 'o no mine anu muxolu no nano no taasou navunavu ne Romu. No mine anu muxolu no taasou navunavu ne, la mulomusou a'alosi'a ta Pilipai lexe ta mitema mose'i mine'e mia'aloi'a no anu a'alo kalakalavoi mose'i, la muxovulauvaulixa'a. Ia no mine nenge taitiiti no nano no anu uoli voloxu 'o, la tamaisou mimii e mu'oxonu Paulo opo tu'umaxu no anu ne uasi. Mimii ne mutalume ia tamaisou lexe Paulo mumuxaxu tanu noxou Iesu pekia'u manina xe 'osa'ilasi mu'ana'ana noxou.

Paulo mukaXavunu uoli voloxu ane 'o mulai noxi'a ta Pilipai ne sou ulemolu laixe noxi'a. Xo tei no mine anu mumasaxau su'uli, la ane'i misu'ulinu laixe. Mo anu umusaxa lexe u'oxonu pekia'a. Xo loxo 'o io ane'i ixavutalanu no anu tu'umaxu noxou xe tu'utu'umaxu noxi'a, la ulosi'a tu'umaxu la. La sou anu muvikalane'i lexe mii tatila Lataua mulosinge ane mauli. Mauli ne ngeno'u noxou Kalisito Iesu. La musolonu la lexe mauli e ngeno'u ne, ngeno'u no anu 'ilixu sou ngemulimulinu lapuloto noxi'a ta Iutaia uasi. Anu muvikalane'i lamana lexe mauli alavua e ane'i mino'u ne, xo ane'i mimuxaxu tane'i noxou Kalisito. Mo muvikalane'i lexe laixe lexe ane'i imulinu masaxa noxi'a mo i'itine'i mamu, ia imulinu 'ilixu noxou Kalisito. Anu u'itinu mo uxavutala lexe anu itema tila xe umulinu masaxa noxou uasi. Anu mutaloxolixu sou mu'oxonu xaixai e Lataua mupalusou sou u'oxonu. Mo muvikala lexe ta mitema e mixolu noxou Kalisito ne opo se'isisi noxou Lataua xe 'osa'ila u'ana'ana no anu mauilixa'a utotomu.

No anu uoli voloxu ane 'o la tamaisou lexe muvikala pekia'u no anu 'ili'ilixu sou 'osa'ila, tatulu pekia'inge, tapita xe xavinenge no anu mauli ane teno'u no mine temuxaxu tanenge noxou Kalisito. Xe tamaisou lexe no nano no anu uoli voloxu 'o, la nenge tamaisou lexe Paulo tanuxa'a ta temanu lalotu ne Pilipai manina.

### A'alo muai no nano aloxo 'o

Vaikala lamana 1:1-2

Paulo mukilakasi'a ta Pilipai 1:3-11

Misakisakiinu Paulo la musu'ulinu a'alo laixe 1:12-26

Vateteli noxou Paulo 1:27–2:18

Tito ilou Epapulotitosi 2:19-30

Ngalaxa'i noxi'a ta uluamengi 3:1–4:1

Vateteli kaluxusou mo vaikala sou sexela xe kaluxusou 4:2-23

**1** <sup>1</sup>Eni Paulo, nexi noxou Timoti ta mitema sou xaixai noxou Kalisito Iesu, tekaukavunu vaivaikala ane 'o ulai noxinge ngingi ta mitema ane Kalisito Iesu ta na'u mo ta tatila sou isaxila'inge ilo'a ta mitema sou xaixai no 'a lalotu ne Pilipai.

<sup>2</sup>Nexi noxou takilaka lexe alauna mo opo se'isisi noxou Lataua Maminge mo Tila Iesu Kalisito uxolu noxinge.

### Lakilaka Noxou Paulo

<sup>3</sup>Eni alemo laixe musuku ulai noxou Lataua utotomu, no mine eni axavutalangengi. <sup>4</sup>No mine eni akilakasinge ngingi latala, la no voxovoxo ne eni a'osa manina. <sup>5</sup>Xo musoko no mine nenge nenge'a tea'aloxu a'alo laixe sou Iesu mo mune'e muxali vaimomo 'o la nenge nenge'a texaxai tepita. <sup>6</sup><sup>b</sup>Xo eni elavusou manina aloxo 'o. Lataua musokou xaixai laixe noxinge mo Anu a usolonu sio xe ukalusou manina no voxo ane Kalisito Iesu ulivu une'e la.

<sup>7</sup>La sou anu laixe manina lexe eni axamulinu aloxo ne singe ukalusi lexe Lataua usolonu xaixai noxou. Xo ngingi latala ne, nenge nenge'a texaxai tepita no anu xaixai laixe ane Lataua mualaunasilo la mulosinge. Mo eni a'osa sou axavutalangengi utotomu no mine ane'i misakisakileli, xe no mine utotomu eni a'oxo latolosou xe a'oxo pekia'usou a'alo laixe noxou Iesu. <sup>8</sup>Lataua mulavusou manina lexe no nano no anu masaxa noxou Kalisito Iesu la eni emasaxainge ngingi latala no nano no taleli manina sou amaisinge.

<sup>9</sup>La sou eni akilakasinge aloxo 'o. Ngingi ngalavusou vaikala maninasou musuku mo ngalavusou mii ma'ia ane laixe xe masua, la sou 'ilixi sou tangengingenge ngatongato'o uxali pekia'u musuku. <sup>10</sup><sup>c</sup>Mo eni akilakasinge la aloxo 'o. Ngingi umomomo sou ngatongonu mii ma'ia ane maninasou mo ngaxolu va'axu no anu 'ili'ilixi masumasua xe ixalisou susu vile noxinge uasi ulai uxali no voxo ane Kalisito ulivu une'e. <sup>11</sup>Mo maulingenge u'ana'ana no anu 'ili'ilixi ane mulapu molu noxou Iesu Kalisito sou ngingi ngalosou uala tila mo nga'itinu ualasou Lataua.

<sup>a</sup> 1:1 Apo 16:12-40   <sup>b</sup> 1:6 1Ko 1:8   <sup>c</sup> 1:10 1Te 5:23

### Misakii Paulo La Anu Musu'ulinu A'alo Laixe sou Iesu

<sup>12</sup>Ioxe, ta vivilo noxou Iesu. Eni emasaxa lexe ngingi ngalavusou lexe mii ma'ia ane muxali noxilo 'o ne, musu'ulinu a'alo laixe sou musuku mulai no tuatuala. <sup>13</sup><sup>d</sup>Anu aloxo ne, la sou ta mitema sou 'oto'oto isaxila'a ta tatila sie Romu mukalusi ilo'a ta mitema latala mose'i milavusou lexe eni exolu no anu sakisaki xo eni amitema sou xaixai noxou Kalisito. <sup>14</sup>Tava'u xo eni exolu no anu sakisaki, la sou mii ane ne mu'oxonu pekia'a ta vivilo latala noxou Tila sou mia'aloXu vaikala noxou Lataua. Ane'i mia'alo la i'ume uasi, ia mitulu pekia'a.

<sup>15</sup>Ia anu manina xo se'i ia'aloXu Kalisito ualasou ia ane'i opone'i masuailo, mo i'oxonu sou lexe iuaulixo no anu, xe se'i ia'alo no anu xavutala laixe. <sup>16</sup>Ane'i ane ia'alo no anu xavutala laixe i'oxo aloxo ne xo ane'i tane'ixi mo milavusou lexe Lataua mumulaxo lexe sou a'oxonu latolosou a'alo laixe noxou Iesu. <sup>17</sup>Ia ane'i ane ia'aloXu Kalisito ualasou no anu opo masua ne, i'oxo aloxo xo ane'i mimasaxa lexe ualasi'a uxali tila noxilo la i'oxonu xaixai laixe uasi. Mo mimasaxa lexe ane'i i'oxonu tu'utu'umaxu une'e noxilo no mine eni axoxolu no anu sakisaki 'o. <sup>18</sup>Ta mitema ia'aloXu Kalisito ualasou no anu xavutala iouiou. Se'i ia'alo no anu xavutala masua xe se'i no anu xavutala laixe. Ia anu mii vile uasi! Ia mii tila noxilo ne aloxo 'o. Eni emasaxa lexe ta mitema ilomusou a'alosou Kalisito 'osi. Tava'u aloxo ne, la eni a'osa. Ani, eni a'osa'osa utotomu aloxo ne.

<sup>19</sup><sup>e</sup>Xo eni elavu lexe no anu lakilaka noxinge mo su'uli noxou Uleenu Tavuna noxou Iesu Kalisito, la anu usu'uli sou upamaulileli. <sup>20</sup>La sou eni emasaxa manina mo eoopala lexe eni umomomo sou amaela no anu mii vile uasi. Ia axolu pekia'ilo mo sou eni a'itinu Kalisito ualasou vaimomo 'o mo utotomu no anu mii ma'ia ane eni a'oxonu mo alemolu. Mo eni a'itinu ualasou no mine eni amauli xe no mine eni asoli. <sup>21</sup><sup>f</sup>Xo eni maulixo ne, noxou Kalisito 'osi xe eni asoli la anu mii laixe manina. <sup>22</sup>Ia lexe eni amauli no lia 'o, la eni amomomo sou asolonu xaixai noxilo mo asu'uline'i ta mitema tavu'alo ino'u Kalisito no anu maulixa'a. Ia eni asosovosou vote'i anevaa? Eni alavusou uasi! <sup>23</sup><sup>g</sup>La sou mii ta tamei ne muatasilo manina. Ia masaxa tila noxilo ne lexe eni alaisi mo axolu noxou Kalisito. La mii ane ne, anu laixe manina musuku. <sup>24</sup>Ia, xo noxingesi la anu mii tatila lexe eni amauli no lia 'o. <sup>25</sup>Eni elavu manina aloxo ne, la sou eni elavusou lexe eni axolu mo nenge nenge'a taxolu mo tasolonu xaixai mo sou ngingi ngamulaxu tangengi pekia'u musuku noxou Iesu mo nga'osa manina. <sup>26</sup>No mine eni ane'e noxinge la, la ngingi ngatoxoleli manina noxou Kalisito Iesu.

<sup>d</sup> 1:13 Apo 28:30   <sup>e</sup> 1:19 2Ko 1:11   <sup>f</sup> 1:21 Xal 2:20   <sup>g</sup> 1:23 2Ko 5:8

<sup>27h</sup>Ioxe, eni avikalangengixu mii vile tatila aloxo 'o. Ngamomosou muamua'ingenge mo maulingenge umomomo no anu a'alo laixe noxou Kalisito. Xe no mine eni ane'e mo amaisinge, mo no mine eni axolu va'axu ia alomusou a'alosinge, la eni alavusou lexe ngingi opongengi vilesisi. Mo ngetulu pekia'inge xe xavutalamengi vilesisi mo ngetulu ngepita sou ngexaxaisou a'alo laixe sou Iesu sou ta mitema imulaxu tane'i no anu. <sup>28</sup>Mo eni elavusou lexe ngingi nga'ume'a ane'i ane ilea anaxa'a une'e noxinge uasi. Ngingi ngamaisou aloxo ne, la anu sosovo lexe Lataua ukalusi'a, ia Anu upamaulingengi. Mii ane ne anu molu noxousi. <sup>29i</sup>Xo Anu mualaanasinge mo mupelemasaxangengi lexe ngingi ngamuxaxu tangengi noxou Kalisito la ngano'u navunavusou kalumo. <sup>30</sup>La sou vaimomo 'o, ngingi ngexalisou tu'utu'umaxu iouvilesisi aloxo ngingi ngemaisou muxali noxilo tei mo ngelomusilo lexe mii ane ne 'a uxoxolu noxilo sio.

### Iesu Mutaloxolixu La sou Laixe Lexe Nenge Kalumo Tataloxolinenge

**2** <sup>1</sup>Aloxo ne, la sou eni atali'isinge aloxo 'o. Maulingenge noxou Kalisito ne, mu'oxonu xavutalamengi pekia'u? Mo tanutanuxu noxou muxolixolingengi? Mo ngingi ngongi'a Uleenu Tavuna ngexolu ngepita? Xe ngingi ngamasaxai'a mo tangengixa'a ta menexinge? <sup>2</sup>Lexe ngingi ngakolileli laixe, la eni avikalangengi aloxo 'o. Ngingi xavutalamengi vilesisi mo ngingi tangengixa'a ta menexinge no 'a opo ilou xavutala vilesisi. Ngingi nga'oxonu aloxo ne, la eni a'osa manina. <sup>3j</sup>Mo eni avikalangengi la aloxo 'o. Lexe ngingi nga'oxonu mii ma'ia, la mamu sou ngaxavutalangengisi mo nga'oxonu sou ane'i i'itinu ualasingesi, ia ngataloxolingenge mo ngamaisi'a ta menexinge loxo ane'i teitexi noxinge. <sup>4k</sup>Mamu sou ngingi ngaxavutalanu mimemimengisi mo maulignengesi. Ia ngaxavutalanu ta menexinge mi'ami'a mo maulixa'a kalumo.

<sup>5</sup>La sou ngingi ngano'u xavutala laixe aloxo noxou Kalisito Iesu.

<sup>6l</sup>Anu Lataua manina, ia uxavutala lexe Anu Lataua mo utetelisou xavi noxou Lataua uasi.

<sup>7m</sup>Ia Anu muxolu vitanisi loxo itema sou xaixaisi noxou Lataua mo muxali loxo nenge ta mitema 'osi.

<sup>8n</sup>Mo ta mitema mimaisou loxo itema. Ia Anu mutaloxolixu mo mumulinu masaxa noxou Momu mulai mutalo no anu soli noxou no mine mililixu teitexi no ovu valautu.

<sup>9o</sup>Xo Anu mu'oxonu aloxo ne la sou Lataua mutelailixu muxolu teitexi manina, mo mulosou uala ane mutila no anu uala tavu'alo mukalusi,

<sup>h</sup> 1:27 Ep 4:1; 1Te 2:12   <sup>i</sup> 1:29 Apo 16:19-40   <sup>j</sup> 2:3 Xal 5:26   <sup>k</sup> 2:4 1Ko 10:24   <sup>l</sup> 2:6 Ioa 1:1-2; 17:5   <sup>m</sup> 2:7 Ioa 1:14; 2Ko 8:9   <sup>n</sup> 2:8 Eva 5:8; 12:2   <sup>o</sup> 2:9 Apo 2:33; Ep 1:20-21; Eva 1:3-4

10<sup>p</sup>mo sou no anu uala noxou Iesu ne, la ta mitema xe ta mimii latala ukalusi teitexi no opo loxotolo, mo no lia 'o, mo no tuala noxi'a ane'i ane misoisoli ixola'u tava'a sou ilotu noxou.

11<sup>q</sup>Mo ta mitema latala ukalusi ipala'alixu Iesu Kalisito lamana no 'a anaxa'a lexe, "Anu Tila." La sou ane'i i'itinu Lataua Maminge ualasou.

### Ngakaakaa loxo ta Oto

12<sup>r</sup>La sou ta menexilo e eni emasaxainge misevile. Aloxo ngelomuxo utotomu no mine nenge nenge'a texolu mo ngalomuxo lailaixe no mine eni e'umesinge 'o, ngasolonu ngaxaxaisou mauli ane kaluxu uasi e ngeno'u mukalu. Ngaxaxaisou mauli ane ne, la nga'ume mo ngamama'u. 13<sup>s</sup>Xo Lataua anu muxolu noxinge mo uxaxaisinge sou nga'osasou ngamulinu masaxa noxou mo nga'oxonu xaixai ane anu mumasaxa lexe ngingi nga'oxonu.

14<sup>t</sup>Mo nga'oxonu xaixai mii ma'ia, la mamu sou ngakalalalapu piena mo nga'otosou anangengesou. 15<sup>u</sup>Mo sou ngingi ngaxali ta mitema ane imaisou susu vile noxinge la ivikala piena no anu uasi. Mo ngaxali Lataua ta 'olu ane susu vile uxolu noxinge uasi no taiine'i ta mitema ane ta masumasua mo xavutalane'i masumasua. Ngaxolu no taiine'i, la ngakaakaa loxo ta oto. 16<sup>v</sup>Mo ngatetelisu vaikala sou mauli pekia'u. Nga'oxo aloxo ne, la eni a'itinu ualasinge no voxo ane Kalisito ulivu une'e. Xo anu umaxa'u lexe xavileli mo xaixai noxilo ne, mii vitanisi uasi. 17<sup>w</sup>Ngingi ngemulaxu tangengi noxou Iesu, la sou nga'oxo'oxonu xaixai ulai noxou Lataua. Ia lexe eni asoli mo sialuxo unixi no anu xaixai ne la loxo ane'i inixi'u uaini loxo iaiaama noxilo ulai noxou Lataua, la eni a'osa mo nenge nenge'a ta'osasi. 18<sup>x</sup>La sou laixe lexe ngingi kalumo ne, nenge nenge'a ta'osa.

### Timoti Ilou Epapulotitosi

19<sup>y</sup>Ia eni emasaxa manina lexe eni 'ala'alai sou apalusou Timoti ulai noxinge lexe Tila Iesu uvikalaleli, la sou eni kalumo a'osa no mine alomusou a'alosinge noxou. 20<sup>z</sup>Xo eni axalisou itema vile ane mulavusou masaxa noxilo loxo anu Timoti 'o uasi. Anu uxavutalangengi loxo eni axavutalangengi. 21<sup>aa</sup>Xo ta mitema ukalusi ne ixavutalanu mii noxi'asi ia ixavutalanu mii noxou Iesu Kalisito uasi. 22<sup>ab</sup>Ia ngingi ngelavusou lexe Timoti mu'oxonu xaixai laixe noxou. Mo nexi noxou tapita taxaxaisou a'alo laixe noxou Iesu loxo itema vile ilou 'olu. 23<sup>ac</sup>La sou eni emasaxa manina lexe eni apasipaa apalusou no voxo ane eni elavusou lexe mii ma'ia uxali noxilo. 24<sup>ad</sup>Mo elavusou manina lexe eni kalumo 'ala'alai sou ane'e noxinge lexe Tila uvikalaleli.

<sup>p</sup> 2:10 Rom 14:11    <sup>q</sup> 2:11 Rom 10:9    <sup>r</sup> 2:15-16 Tan 12:3; Pil 1:10; 1Te 2:19    <sup>s</sup> 2:18 Pil 3:1; 4:4    <sup>t</sup> 2:21 2Ti 4:10

<sup>25</sup> "Ia eni exavutala lexe eni apalusou Epapulotitosi ulivu ulai noxinge. Anu vivilo noxou Iesu, mo noxou texaxai tepita, xe anu mutulu no pa'umelo loxo itema sou 'oto'oto. Mo anu kalumo itema sou uno'u vaikala ulai noxinge ane ngepalusou mune'e sou usu'ulileli no anu mii ma'ia ane eni emasaxau. <sup>26</sup>Eni apalusou ulivu, xo anu tanu u'oxongenge ngingi latala mo umasaxa umasinge la, la opo tu'umaxu. Xo ngingi ngelomusou lexe anu pipiena mu'oxonu. <sup>27</sup>Anu mupiiena ne, manina mo sexasisi sou usoli, ia uasi. Xo Lataua mualauasou. Ia Anu ualaunasousi uasi, Anu mualauanasilo kalumo sou musu'ulileli la eni axamulinu tu'utu'umaxu malaxo loxo tei uasi. <sup>28</sup>Aloxo ne, la sou eni apasipaa mo apalusou ulai noxinge. Mo sou ngingi ngamaisou la, la nga'osa. Xe eni kalumo opoleli uai se'isisi seville. <sup>29</sup>Anu ulai uxali noxinge, la ngingi ngasexelaxu mo nga'osousou manina loxo ta mitema noxou Tila i'osasi'a mo ngataxane'i ta mitema aloxo anu ne. <sup>30</sup>Xo 'ala'alaisi, la anu usoli no anu xaixai noxou Kalisito ia uxavutalanu mauxixu uasi. Ia anu mu'oxonu aloxo ne noxilo sou muno'u taningenge. Xo ngingi nga'oxonu noxilo uasi.

### 'Ilixo Mulapu Maninasou

**3** <sup>1</sup>Ioxe, ta vivilo noxou Iesu. Eni avikalangengi aloxo 'o. Nga'osa noxou Tila! Vaivaikala ano 'o, ngingi ngelomusou ia eni atotosa sou akaukavunu la uasi, xo anu sou usu'ulingengi.

<sup>2</sup>Ngingi ngasaxila'inge laixe noxi'a ta mitema loxo ta a'aa mo ngasaxila'inge noxi'a ane'i ane i'oxo'oxonu 'ili'ilixo masumasua ilo'a ane'i ane ikalavoi sou ixotoxotosou vasime'asi. <sup>3</sup>Ia nengesi xooxoo mungaasinge manina. Xo nenge talotu noxou Lataua no anu Uleenu, mo nenge ta'itinu Kalisito Iesu ualasou xe nenge tamulaxu tanenge no anu mii ma'ia ane nenge ta'oxonu uasi. <sup>4</sup>Ia eni amulaxu taleli no anu mii ma'ia ane eni a'oxonu. Ia mimii tavu'alo no lia 'o a uxolu sou amulaxu taleli no anu.

Ia lexe evile uxavutala lexe mimii se'i a uxolu sou anu umulaxu tanu no anu, la anu umomomo noxilo uasi. Xo noxilo ne, tavu'alo manina. <sup>5</sup>Vile aloxo 'o. Nenilo mivo'oleli xe voxo muxatele tatalusou, la xooxoo mungaasilo. Mo tameisou aloxo 'o. Eni itema Isilaeli no anu mata Beniamini xe eni Evalaio maninasou. Eni Palisaio vile mo emulimulinu lapuloto noxou Mosesi mukalusi. <sup>6</sup>Xe eni emasaxau Lataua misevile la exaxai pekia'u, sou e'oxo masuane'i ta mitema ilalotu noxou Iesu mo evile uxalisou susu vile noxilo no anu lapuloto noxou Mosesi uasisi.

<sup>7</sup>Ia eni ekalavoi lexe mimii ane ne toxoxa'a musuku noxilo, ia uasi. Vaimomo 'o eni elavu lexe mimii ne anu mii vitanisi noxou Kalisito.

<sup>u</sup> 2:25 Pil 4:18    <sup>v</sup> 3:3 Rom 2:29    <sup>w</sup> 3:4 Apo 22:3    <sup>x</sup> 3:5 Luk 1:59; Apo 23:6; 2Ko 11:22  
<sup>y</sup> 3:6 Apo 8:3    <sup>z</sup> 3:7 Mat 13:44-46

<sup>8</sup>Mimii ane nesi uasi ia mimii latala mukalusi ne, eni elavusou lexe anu kalumo mii vitanisi. Xo eni elavusou mii ma'ia ane toxoxa'a musuku no mine eni elavusou lexe Kalisito Iesu anu Tila noxilo. Noxousi, la eni esu'anu mimii ane ne mukalu. Xo eni elavusou lexe mimii ane ne mii vitanisi loxo mosomoso. La sou eni esu'anu, mo sou ano'u Kalisito, <sup>9</sup>mo sou nexi noxou taxolu tapita. La Lataua umoxo'ilo lexe eni itema mulapu, xo xavileli sou emulimulinu lapuloto noxou Mosesi uasi, ia eni emulaxu taleli noxou Kalisito la sou Lataua mumoxo'ilo lexe eni itema mulapu. <sup>10</sup><sup>b</sup>Mo eni emasaxa lexe alavusou Kalisito mo xavi no anu tulu noxou no anu soli xe nexi noxou tapita tano'u tu'utu'umaxu vilesisi mo eni asoli loxo Anu musoli. <sup>11</sup>Mo eni eloopala manina lexe eni kalumo atulu no anu soli.

### Paulo Xaviinu sou Ukalusou Saisale Noxou

<sup>12</sup><sup>c</sup>Ia eni avikala lexe ano'u mii ane ne uao. Mo eni axali itema laixe manina uao. Ia eni xavileli sou ano'u mii ane ne ane Kalisito Iesu musosovosilo lexe eni ano'u. <sup>13</sup>La sou ta vivilo noxou Iesu. Eni ne, melo axavutala lexe ano'u ukalusi uasi, ia mii vilesisi eni a'oxonu. Eni talelivulusiou mii ma'ia ane ili'i no tumalilo ia ieli uuli mo a'atusilo sou ano'u mii ma'ia ane uai no talaxosi. <sup>14</sup><sup>d</sup>Mo eni xavileli sou alai axali no anu sou ano'u lakolisou iave. Lakolisou iave ne, Lataua musosovosilo sou nexi noxou taxolu teitexi loxo Kalisito Iesu muxolu noxilo.

<sup>15</sup><sup>e</sup>La sou nenge latala ane xavutalamente muxali pekia'u manina, la taxavutala loxo eni elemolu ne. Mo lexe se'i xavutalai'a vilemo la Lataua ulamanalixu no anu xavutalai'a. <sup>16</sup>Ia mii tila manina ne aloxo 'o. No anu xoluxolu ilou muamua'inenge, la tamuli xoluxolu aloxo nenge teno'u tei ne.

<sup>17</sup><sup>f</sup>Ta vivilo noxou Iesu, ngingi ngapita mo ngamulileli no anu mii ma'ia ane eni a'oxo'oxonu. Mo ngamalei laixe noxi'a ane'i ane imulimulinexi. <sup>18</sup>Xo ta mitema tavu'alo iulua no anu soli noxou Kalisito no ovu valautu loxo eni evikalangengixu lalalaxu tei. Mo vaimomo 'o kalumo atamasia'a, la avikalangengixu la. <sup>19</sup><sup>g</sup>Ane'i ta mitema ane loxo ne, ili'i la iulua no 'a navu. Mo masaxa sou vasime'a ne muxali tila noxi'a. Mo ane'i i'itinu ualasi'a no anu mii ma'ia ane ane'i i'oxo'oxonu. Ia ili'i la imaela. Xo xavutalai'a ne, mu'ana'ana no anu mimii sou no lia 'osi. <sup>20</sup><sup>h</sup>Ia nenge ne tualasinge no lia 'o uasi, tualasinge manina 'a uxolu teitexi no opo loxotolo. Nenge taxolu taxomaioi itema sou pamauli teitexi molu no opo loxotolo une'e, Anu Tila Iesu Kalisito. <sup>21</sup><sup>i</sup>Anu ne, xaviinu musuku la

<sup>a</sup> 3:9 Rom 3:21-22   <sup>b</sup> 3:10 Rom 6:3-5; 8:17   <sup>c</sup> 3:12 1Ti 6:12, 19   <sup>d</sup> 3:14 1Ko 9:24

<sup>e</sup> 3:15 1Ko 2:6   <sup>f</sup> 3:17 1Ko 4:16   <sup>g</sup> 3:19 Rom 16:18   <sup>h</sup> 3:20 Ep 2:6, 19   <sup>i</sup> 3:21 1Ko 15:28, 42-53

umomomo sou usaxila'u mimii latala ukalusi. La sou no anu xavi ane ne, Anu uxiiunu vasimenge ane usoli xe u'ui la uxali lailaixe manina loxo anu noxou.

**4** <sup>1j</sup>La sou ta vivilo noxou Iesu e emasaxainge musuku. Ngingi ngatulu pekia'inge noxou Tila aloxo eni evikalangengixu. Eni talelingenge mo amasaxainge lexe amaisinge la. Xo ngingi nge'oxoleli e'osa. Ngingi ta menexilo ane amasaxainge misevile! Noxingesi la anu loxo kisivalu noxilo.

### Peletoto Noxou Paulo

<sup>2</sup>Ioxe, eni avikala pekia'u ulai noxi'a Euotia ilee Suntoke lexe opone'i uxali vilesisi noxou Tila. <sup>3k</sup>Ani, eni alingaine nini menexilo manina e nengei texaxai tepita lexe nini nasu'uline'i ta sema ta tamei ne. Xo ane'i ilou ilo'a Kulemeni mo ta menexilo mukalusi mitulu no pa'umelo sou noxi'a tea'aloxu a'alo laixe noxou Iesu. Ane'i ualasi'a ne, mikaukavunu mo muai no lavuku sou mauili.

<sup>4</sup>Ngingi nga'osa noxou Tila no voxovoxo utotomu. Mo eni avikalangengi la lexe nga'osa.

<sup>5l</sup>Ngaxolu se'isisi mo ta mitema imaisou 'ilixu ane laixe noxi'a. Xo anu 'ala'alai sou Tila ulivu une'e. <sup>6m</sup>Xavutalamengi utulu no anu mimii tavu'alo mamu. Ia ngaxolu se'isisi mo ngakilaka xe ngalingau mimii latala e ngingi ngemasaxau noxou Lataua. Mo utotomu ne ngalemo laixe noxou. <sup>7n</sup>Xo opo se'isisi noxou Lataua anu tatila musuku. Nenge umomomo sou talamana no anu uasi. Xo tamulaxu tanenge ilou xavutalamenge ulai noxou Kalisito Iesusi.

<sup>8</sup>Ta vivilo noxou Iesu, vaikala kaluxusou noxilo aloxo 'o. Ngaxavutalanu mimii ane maninasou. Mo 'ili'ilixu ane laixesi noxou Lataua. Mo ngaxavutalanu mimii ane mulapu, mo ane malemalenga, mo mimii ane 'osasingexu, xe ane itaxangengi no anu mo i'itingengi no anu mo mii ane'i imasaxau musuku. <sup>9o</sup>Nga'oxonu mii ma'ia ane ngeno'u lavulavu no anu mo ngeno'u noxilo mo ma'ia ngelomusou eni evikalangengixu, xe ma'ia ane ngemaisilo e'oxonu. La nga'oxonu 'ilixu ane ne maninasou. Mo sou Lataua e mulosinge opo se'isisi ne uxolu noxinge.

### Paulo Mulemolu Laixe no Anu Su'uli

<sup>10</sup>Eni a'osa misevile noxou Tila xo ngingi ngemaxa'u tanengi mune'e noxilo. Mo ngingi ngesolonu sou ngesaxilailo. Ia vote'i vile sou ngamaxa'u uasi tei. <sup>11</sup>Eni avikalangengixu mii ma'ia ne xo anu loxo eni no nano no

<sup>j</sup> 4:1 1Te 2:19-20 <sup>k</sup> 4:3 Luk 10:20 <sup>l</sup> 4:5 Eva 10:25; Iak 5:8-9 <sup>m</sup> 4:6 Mat 6:25-34; Kol 4:2  
<sup>n</sup> 4:7 Ais 26:3; Ioa 14:27; Kol 3:15 <sup>o</sup> 4:9 Rom 16:20



'a ane ne uasi. Eni eno'u lavulavu sou no anu mimii ane noxilo mo mimii tavu'alo ane muxali. <sup>12</sup>Eni elavusou lexe axolu a loxovaa no voxo ane eni xeni mimii uasi. Mo elavusou lexe axolu a loxovaa no mine xeni mimii tavu'alo. Mo elavusou lexe axolu a loxovaa no mine xenixo 'ani tavu'alo xe no mine asolixo. Xe elavusou lexe axolu a loxovaa no voxo sou eni xeni mimii mu'oki xe eni xeni mimii uasisi manina. La eni eno'u lavulavu no anu mii ane uxali no anu maulixo ne. <sup>13</sup><sup>p</sup>Xo eni amomomo sou a'oxonu mimii latala no anu xavi noxou Kalisito ane Anu mulosilo.

<sup>14</sup>Ia anu laixe lexe ngingi ngasu'ulileli no anu tu'utu'umaxu noxilo. <sup>15</sup><sup>q</sup>Ngingi ta Pilipai, ngaxavutalanu voxo ane eni esokou sou ea'aloXu a'alo laixe noxou Iesu. No voxo ane eni e'umesie Makedonia la ngingisi ta mitema ilotu noxou Iesu ne, ane ngesu'ulileli mo ngekolileli. Ia lalotu ukalusi isu'ulileli sou ukolileli uasi. <sup>16</sup>No voxo ane eni exolu ne Tesalonika, la ngingi ngesovanu mimii ane eni emasaxau mune'e noxilo alaxu mose'i mo. <sup>17</sup>Anu manina, ia eni amasaxa sou ano'u mimii ane lexe ngalosilo ne uasi. Ia amasaxainge lexe nga'oxonu lakolisou noxou Lataua utelo no latanu 'ili'ilixo laixe. <sup>18</sup>La sou vaimomo 'o eni eno'u mimii latala mose'i la. Ia vaimomo 'o eni eno'u mimii latala ane eni emasaxau. Xo Epapulotitosi musaxanu mii ma'ia lexe ngalosilo ne anu muno'u mune'e noxilo. Anu aloxo iaiama ane tuma'u lailaixe mielaxu mulai noxou Lataua. Anu mumasaxau mo opoo mu'osasu. <sup>19</sup>Lataua noxilo uxaxai no anu lavuluti lailaixe noxou Kalisito Iesu sou ulosinge ta mitema noxou mimii latala umomosinge ane ngingi ngamasaxau. <sup>20</sup>Ta'itinu Lataua Maminge ualasu utotomu mo kaluxu uasi. Manina.

#### Vaikala sou Sexela Noxou Paulo Kaluxusou

<sup>21</sup>Ngasexelaxa'a ta mitema latala noxou Lataua no ualasu Kalisito Iesu. Ia ane'i ta vivinge noxou Iesu ane nexi noxi'a texolu 'o misovanu sexela noxi'a ulai noxinge kalumo. <sup>22</sup>Mo ta mitema latala noxou Lataua mo ane'i ane mixolu no nano no tani tila noxou Kaisari' lai 'o misova sexela mu'oki noxi'a ulai noxinge. <sup>23</sup>Alauna mo saxisaxila'u noxou Tila Iesu Kalisito uxolu noxinge. Manina.

---

<sup>p</sup> 4:13 2Ko 12:10   <sup>q</sup> 4:15 2Ko 11:9   <sup>r</sup> 4:22 Namaisou ualauala laalaaxu.